



Comunu de Quartu Sant'Aleni



Biblioteca de Flùmini: su 25 de argiolas atòbiu cun s'autori Ivo Murgia, mùsica de Andrea Serpi

Sa Biblioteca de Flùmini in bia Mar Ligure si invitat a s'atòbiu cun Ivo murgia, chi giòbia su 25 de argiolas 2024 a is 18:30, at a contai de su liburu de viàgiu nou cosa sua **“Click”**, acumpangiau de sa mùsica de Andrea Serpi a sa ghitarra, torrendi a partiri de s'album cosa sua **“Firmu”**.

Su liburu (Cenacolo di Ares, 2023): Click est unu contu de viàgiu nou de Ivo Murgia, antzis duus. Su volumi difatis ponit impari duus contus de viàgiu, su primu intitulau Click e ambientau in Sudafrica e su segundu Manioc ambientau in Indonesia. Sa spiegatzioni de su sèberu de is tìtulus est donada aintru de su volumi etotu. Si chistionat de duus viàgius chi s'autori no acostumat a fai, su primu totu dedicau a sa natura e a is animalis, su segundu cun una parti manna asuba de su mari feti, cosa chi acuntessit pagu a unu chi in mari ddoi bivìt gai e difatis pagu imperada in is liburus e in is viàgius de Ivo Murgia. In sa primu parti si contat su Stadu africanu po mèdiu de is parcus suos, incarrerendi de su Kruger, e is animalis spantosus chi ddoi sunt bessendi puru foras de is làcanas po arribai in su regnu de su Eswatini, ex Swaziland. In sa segundu parti protagonistas sunt is ìsulas de s'arcipèlagu indonesianu, in piessignu Bali, Gili e Lombok, cun paesàgius spantosus e una cultura de incantu e is chi ddoi bivint chi sunt de sètiu bonu e garbosus.

S'eventu est a indonu. Po preguntas e prenotatzionis si podit tzerriai a su nùmeru de telèfonu 070/86012810 o mandai unu curreu a s'indiritzu: biblioflumini@comune.quartusantelena.ca.it